



~~C7840~~

Mc 8800



stdr0015370

Biblioteka Jagiellońska

Mc 8800

Funeris Laudatio
S E R E N I S S I M I
S I G I S M V N D I I I I
P O L O N I Æ R E G I S
M A G N I D V C I S L I T H V A N I Æ
R V S S I Æ, P R V S S I Æ, M A S O V I Æ,
S A M O G I T I Æ, L I V O N I Æ Q.


N E C N O N

S V E C : G O T T : V A N D Q :
H Æ R E D : R E G I S

AB ILLMO ET RNDMO IN CHRISTO P.

D. STANISLAO LVBIENSKI
EPISCOPO PLOCENSI,

Scripta.



C R A C O V I Æ,

In Officina Andrea Petricouij, S. R. M. Typographi
Anno Dñi, M. DC. XXXIII.

Ludovico Gynowar a Gasto Mo Janne Gynowar



Ex
Biblioth. Regia
Berolinensi

v41s 665274

Laudatio Funebris

S E R E N I S S I M I

SIGISMUNDI III.
POLONIARVM ET
SVECIAE REGIS, &c.

IN theatro lugubris mæstitiæ, & acerbissimi doloris positū, intuemur Serenissimum & Inuictissimū Principem SIGISMUNDVM III. Poloniarum & Suecorum Regem: ille Europæ, Asiæ, & Africæ, in potentissimo Turcarū Imperatore, quē non minus fortiter quā felicitē à ceruicibus nostris repulit, victor: ille latè parētis Moschouie, expugnato Smolésco, Vrbe Regiā, ac tātī Regni, quod Europæ ingētes recessus suā iurisdictione complectitur, Principe Suiscio, vnā cum duobus fratribus capto, triumphator magnificus: ille immanissimæ omnium quæ sub Sole extant Tartaricæ nationis terror: ille omnium hostium domitor: illa pietas, illa Religio, illa iustitia, ille humani generis amor & delitiæ: ille, qui quadraginta quatuor & amplius annorū felicissimi imperij successu, id consecutus est, vt Rex sui temporis Regum dici & haberi mereretur: ille qui Augustis domus Austriacæ connubijs, vniuersi Christiani orbis Reges & Principes, illustrium affinitatum nexibus, sibi de-

sibi deuinxerat: ille Regiæ sobolis ad salutem Reipubl: Christianæ natæ felix Pater: ille inquam SIGISMUNDVS, qui & originis nobilitate, & Regnorū quibus præfuit felicitate, & imperij diuturnitate, omnes sui temporis Reges longè superauit, esse desijt; & se vixisse, hoc supremi exitūs sui tristi spectaculo, testatur. Lachrymisnè eius mortem decorare, an memoriâ Heroicarum Magni Regis virtutū animos à mærore & tristitiâ auocare conuenit, Vobis, qui præsentés adestis, dispiciendum relinquo. Illas quidem poscit Dómus Regia, tanto orbata parēte: poscit inprimis Serenissimus Princeps VLADISLAUS SIGISMUNDVS noster Electus, & Suecorum Gottorumq; Hæreditarius REX; poscunt omnium Ordinum & Statuum Regni Poloniæ, & Mag: Duc: Lith: quos atratos & frequētes videmus, inclyti Senatores, Equites, & Proceres: poscit deniq; hæc funebris pompa, ad excitandum dolorem composita: cæterum hæc omnia ad vnus alteriusuè diei, vt rerum humanarum conditio fert, decursum duratura, linquamus alijs. Deflebūt SIGISMUNDVM, quos naturæ lex, lachrymas fundere iubet: deflebit vniuersa Respubl: nostra, quam diu nominis Polonici exstabit memoria: deflebimus nos, qui eius beneficijs creuimus, honoribusq; ab eo aucti ac ornatī conspici-mur. Fundemus non stipendiarias, nec tristi cohortatione extortas lachrymas; spontè illæ fluent, maioremq; in pectoribus, animisq; nostris cōtineri dolorem quàm palam ostendunt testabuntur. Sed nos interim ad alia Orationem nostram conuertamus, ingens-

ingensq; & magnum pelagus virtutum, huius qui quondam Magnus Rex, nunc exangue cadauer cernitur, ingressi, in earum admiratione aliquantisper immoremur. Neq; sanè quisquam existimet temerè vel audacter me hoc munus suscepisse: non temerè, nā hæc Prouincia nutu Tuo Serenissime REX VLADISLAUS, ad me delata est: non audacter nimis, nam propè quadraginta annorum obsequio, plus plerisq; experimenti capere potui quod ad præsentē vsum feruiat. Scio ego Regias virtutes, sub vulgarem cēforiæ notæ æstimationem cadere non posse. Sublimius & maius iudicium illæ sibi deposcunt: de quibus cū multi multa dixerint, scripserintq; , ego potissimum eas deligam, ex quibus Regiam SIGISMUNDI Coronam compactam fuisse, vel ipsa inuidia fateatur necesse est. Audeamus igitur aliquid plus genio & ingenio nostro, ordiamurq; magis verā, quàm ornatā, oratione susceptum exequi munus.

Christiani & Catholici Regis virtutes recensenti, viro Ecclesiastico, maximè conuenit, vt dicendi initiumumat à Pietate, à religione, à constanti augēdi & promouendi cultūs Diuini studio. Hæc enim omnium virtutum esse prima, & præcipua fundamenta, impius sit, qui negauerit: super hanc basim, feliciter assurgunt parietes cunctarum perfectissimarum actionum, cū nihil ritè, nihilq; prouidēter homines, sine Dei immortalis ope, consilio, honore, auspiciari possint. Nisi fortè quispiam, vt sunt hominum ingenia, obstrepere voluerit, & cæteras quidem virtutes æmulandas Principi non negauerit;

pietatem religionemq; priuatorum hominum occupationem esse contenderit. Talem talesq; ego, si modo tanta impietas vllibi receptum habeat, extra orbis Solisq; vias reiecerim, & indignos iudicauerim qui communi aurâ, communibusq; vitæ subsidijs, perfruantur. Regius vates Spiritu Sancto afflatus, cum sciret plerosq; Reges vel efferri superbiâ, vt homines se esse vix meminisse velint; vel certè, quæ summa impietas est, pietatis studia ceteris actionibus postponere; vel accendi iracundiâ, vt ad crudelitatem exercendam prono ferantur impetu; ab hac amentia auertere eos conatur. *Et nunc, inquit, Reges intelligite, erudimini qui iudicatis terram, seruite Domino in timore, & exultate ei cum tremore: Apprehendite disciplinam, ne quando irascatur Dominus, & pereatis de viâ iustâ.* Intelligite, vos pari cum cæteris esse conditione, naturâ mortales, necessitate & lege fati mox morituros. Erudimini, nam etiam si terræ sitis Iudices, etiam si ius ex æquo & bono dicatis, etiam si viam iustam tenere videamini: nisi tamen disciplinam non terrenâ: sed cælestem apprehenderitis; nisi Domino cum timore serueritis; nisi trementes laudes eius decantaueritis, & nomen sanctissimum, Maiestatem illam omni maiestate maiorem, exaltaueritis; ex hac ipsâ viâ, quæ vobis iusta videtur, ita decidetis, vt vos perisse serò quidem, sed serò, sitis dolituri. Cæteræ virtutes, (inquit Valerius Maximus) admirationis tantummodò multum, pietas verò etiam amoris meretur plurimum. Ad hanc Serenissimum Regem nostrum, non factum, sed natum vidimus; hanc ex ipsis mater-

materni traxit visceribus, hanc suxit ex vberibus. Merito S. Gregorius, vel ipse potius Spiritus Sanctus, dum stupendum illud inuictæ patientiæ exemplar, Iobum, in terrâ Hus, quæ erat erroribus impijs infecta, natum refert, id illius laudi & præconio adscribit; quod vir pius, inter impios conuersatus, pietatis tramitem non deseruerit: esse enim bonum inter malos, plus est, quàm si inter optimos optimus appareres. Non obfuit SIGISMUNDO, imò profuit, nasci in Regno Hæretico, & eo Patre qui ad suum arbitrium religionis causam reuocabat: blandimentis, quæ iuuenilem animum faciliè commoueret urgebat Pater, sibi gratum fore, si filius suæ sententiæ, vel opinioni potius erroneæ, accederet; sed & minæ, & ipsa penè vis admota, stabile pectus loco mouere non potuerunt, seu vera seu ficta Senatûs Suetici denunciatio, cariturum Regno, nisi nouæ religioni nomen daret, id extorsit, vt cervicem potius se daturum, quàm religionem Catholicam deserturum, profiteretur. Hæc admodum iuuenis, inter Hæreticos Magistros, ac eorum & Patris imperio obnoxius, iam Matre sanctissimâ fœminâ orbarus, illius tamen monitorum memor, dixit fecitq; prudenter, constanter, religiosè. Tantis initijs totus deinceps vitæ decursus, optimè respondit. Ita semper vixit SIGISMUNDVS, vt eius pietatem Summi Ecclesiæ Præsides laudarent, Reges Christiani admirarentur, Ciues amarent, hostes pertimesceret: ipse inter maxima positus pericula, eâ ubiq; tutus parata vitæ discrimina inaudita felicitate euitarit, superaritque.

Dum

Dum Christi religio, dum Ecclesia Catholica, dum sincera Euangelicæ veritatis professio durabit; quæ tamen omnia ad supremum totius vniuersi exitum duratura, Christus ipse spondit: extabunt in Polonia & Lithuaniam, nobilissima monumenta SIGISMUNDI Regis, pietatis, magnificentiæ, liberalitatis, Templum Basilico opere instructum. Aræ, Altaria, Diuorum Statuæ, auro & argento fusæ, testabuntur SIGISMUNDVM Regem, neque erga Deum pietate, nec erga Sanctos Dei veneratione, cuiquam etiam maximorum & sanctissimorum Regum concedere voluisse. Loquetur & sponte agnoscet Polonia, quæ illo Regnum auspicante magnam Senatûs partem, ut inferiorum Ordinum homines silentio prætereâ, diuersis infectâ hæresibus vidit, se propè vniuersam cum amplissimis Prouincijs suis, ad veteris Orthodoxæ & Catholicæ Romanæ religionis normam, paternam & piam tanti Regis curam, traductam. Neque ille ad id efficiendum vllâ vi opus habuit: sola ipsius pietas, sola erga Deum religio, erga Sedem Apostolicam obseruantia, mentis puritas, corporis castitas, vnumquemque commouere poterat, ad obseruandum, magnique æstimandum, tantum Principem, eiusque præstantissimas virtutes æmulandas: itaque pij regiminis dulcedine, adeo mox cunctorum hominum animos pellexit, ut ad sui exemplum penè totam composuerit Poloniam. Multa hac de re dici possent, multa adferri, quæ fortasse Catholicis viris grata essent; aduersariorum verò aures minùs iucundo sono ferirent: sed ille, qui dum vixit, pietatis suæ

actus

actus Deo soli notos esse voluit, ne nunc quidem, ut in publicum proferantur velle admittere credendus est. Ad alia igitur transeamus: videamus ut ceteræ Regiæ virtutes, semper quidem pietati coniunctæ, & in eâ fundatæ, in illo enituerint. Iustitia in primis, quam omnium virtutû Reginam meritò viri Sapientes existimauerunt. Agesilaus quidem Rex, cum ab eo quæreretur, vtra virtus esset præstantior: Fortitudo an Iustitia? Grauius respondit: Fortitudinis nullum esse vsum, nisi adsit Iustitia: quod si omnes essent iusti, fortitudini locum non superfuturum. Quàm latè ea virtus pateat, & ad omnes publicas priuatasque actiones sese diffundat, nemini obscurum esse arbitror: hæc honores dignis; hæc præmia meritis; hæc coronas immortalis gloriæ, largitur fortibus; hæc bella definit; hæc pacem moderatur; hæc Principem intra præscriptos regiminis cancellos, hæc subditos in officio, socios in fide continet; hæc fontes punit, innocentes absoluit, excindit latrocinia, regna conseruat, Principes & Reges cælo inserit. Romanos, olim rerum Dominos, nihil magis nobilitauit quàm iustitia: eam autem non Ciuibus tantum, amicis & socijs, sed hostibus quoque suis semper seruandam esse censuerunt; eâ domi forisque, pacis belli; tempore, constanter eminere contenderunt. Mirari sanè licet tanti virtutem in illâ Vrbe æstimatam, ut ei latere non liceret, ab aratro & ligone euocabantur viri fortes: ijs summa imperia, ijs Dictaturæ deferebantur; amplissimi & clarissimi victoribus, triumphus decernebantur. Vetera-

B

nis &c.

nis & emeritis militibus, ea quæ ad senectutem cum honore traducendâ necessaria erant, publico sumptu abundè suppeditabantur: ijs qui in acie, pro patriâ vitâ profudissent, honores, laudes, Statuæ, monumenta æterna deferebantur, ponebantur, consecrabantur. Ac ut omnibus constaret, nonnisi per virtutem honores haberi posse; honori ac virtuti templum dicârunt, interiecto tantû diuisum pariete, ita ut in Honoris templum, nullum esset ostium, nullus nisi per virtutis templum, in illud aditus: virtus enim causâ honoris est, honor effectus virtutis: illa meritum, hic præmium: illa radix, hic fructuosissimæ radicis fructus: sine virtute, nullus verus solidus ac diuturnus honos esse potest, & qui honore priuat virtutem, is homines priuat virtute, ut Cato dicere solebat. Quid ego hoc loco de SIGISMUNDI Regis iustissimi iustitia dicam? Percurramnè omnes eius Imperij annos, & tempora? Non me eò demittam, ut cuncta rimer & peruestigem. Vos pleriq; testes estis, illum nunquam in mandandis Magistratibus, in decernendis honoribus, ita à scopo & suæ intentionis & Reipubl: dignitatis aberrâsse, ut eum hunc vel illum promouisse, vix vnquam poeniteret: magno & acri iudicio expendens & merita & onera, non facile explicabat, quid decreturus, quæ muneri publico admoturus esset: ita plerisq; cunctantior visus, & qui interdum desideria ambientium, longâ expectatione, suspensâ torqueret. Vix tamen accidit, ut præter communem opinionem, quenquam vel dignitate ornaret, vel præmio afficeret. Sciebat enim.

nim optimè, quantum publicæ salutis & suæ dignitatis interesset, dignos Magistratibus præficere. *Est Ecclesiæ 10.*
malum (inquit Spiritus S.) quod vidi sub Sole, quasi per errorem gradiens, à facie Principis: positum stultum in dignitate sublimi, & diuites sedere deorsum. Antiochus Syriæ Rex, *Polyb: lib: 3. Bodinus lib: 6.*
 Medicum consilij sui præsidem fecerat. Ludouicus XI. Gallorum Rex, sutori suo Fetialis ac Internuncij; Tonfori Legati; Medico Magni Cancellarij partes detulerat: ea res ita commouerat Galliæ Nobilitatem, ut parum abfuerit, quin Rex Regno excideret. Nihil tale vnquâ admisit noster SIGISMUNDVS, ab omni eiusmodi sorde alienus, fauebat quidem virtuti, fauebat industriæ, & ut olim Hannibal: *Qui hostem feriet, ille mihi Carthaginensis erit:* sic optimû & dignissimû Ciue eû existimabat, qui & in Sago, & in Togâ, vtilè Patriæ nauaret operam. Altera illa pars iustitiæ, quæ lites discernit; quæ noxios punit; quæ publicâ quietem tuetur; quæ Ciues inter se mutua connectit charitate & cōcordia: quæ bella indicit; quæ fœdera sancit: maiori quidem ex parte non est, nec fuit in potestate Regum nostrorum. Sic prisca instituta Maiorum, sic leges voluerunt, ne Rex priuato arbitrio arma sumeret: ne inconsultis Ordinibus noua fœdera feriret: ne in Ciuis Poloni caput, estimationem, & bona, absolutâ potestate quidquam decernendi ius haberet. Quæ res fortassis ad frenandam libidinem Regum facta, in SIGISMUNDO certè locum non habuit, cuius mite Imperium ac legibus libertatibusq; Regni accommodatum, extra suspicionem fuit, vel maioris authoritatis, vel liberioris potestatis vsurpandæ. Ille quidem, quantum ea res

ad censuram eius pertinuit, quantum conando efficere potuit, & in proprijs Iudicijs, quæ Regiæ Iurisdictionis esse dicuntur, nunquam à tramite Iustitiæ se dimoueri passus est; & ut ij qui Regio nomine Ius dicunt, quàm optimi iustissimiq; ac iuris cæteris peritiores legerentur, omni studio elaborauit. Dicā id quod sentio, bona venia aliorum dictum tamē sit, interfui & præfui Iudicijs Supremis, & in Aula Regiā, cum Vicecancellarij munus obirem, & in ijs Tribunalibus in quibus ex Equestri Ordine lecti Iudices iusdicunt: hæc quidē non possum nisi laudare probareq; utpotē, quæ veram Idæā repræsentant, sinceræ & non contaminatæ libertatis, neque amplius latus existimationis meæ, quod ab inuidiā temerē petatur, patefaciam, nisi ut hoc fatear, Regia Iudicia & in Comitijs Regni, & in Aulicā, ut vocant Iurisdictione, quæ Fiscī, ac Ciuitatum Iuri Magdeburgensi subiectarum, causis continetur, casta, pura, & integra esse. Ita voluit SIGISMUNDVS REX, iustitiæ amantissimus & studiosissimus, ita ad recti Iudicij normam sese accommodauerunt ij, quos ille lateri suo assidere, quos summæ rei præesse, quibus existimationis suæ summam committere voluit. Sed quid ille iniustitiæ admitteret, qui priuatas suas actiones ad Iustitiæ, æquitatisq; regulam semper componebat: qui simulatione & inani ostentatione comparere, indignum sua existimatione putauit: qui semper id egit, ut qualis haberi vellet talis esset. Nescio, (inquit Sanctus Hieronymus) quomodo turpiora sunt vitia, cum virtutum specie colorantur. Si dissimulaue-

Hieron:
Epist. ad
Gal.

Ecc. c.
22.

mulauit

mulauerit, delinquit dupliciter; ait Spiritus Sanctus. Simulata enim æquitas, teste S. Augustino, non est æquitas, sed duplex iniquitas; quia iniquitas etiam est simulatio. Sinceræ, & ad regulam virtutis Regis nostri examinatæ actiones, cæterorum qui tū cum maximē fallunt, id agunt, ut viri boni esse videantur simulationes, damnant & sceleris Hipocritici conuincunt. Hic candor, & non fictæ mentis sinceritas, præclarissimas qualq; Regis nostri actiones, heroicis ac diuinos pro Republica conatus, secundo semper euentu prosperabat: & quamuis primis eius inijs, parum propitium fortuna vultum ostendere solita fuerit, vix tamen vnquam aliquid maius aggresso, felix defuit successus. Admirationem summam excitabat, in animis gentium, & magnorum Principum, eōstanter semper culta, à SIGISMUNDO fides, quā non modo Ciuibus, sed hostibus suis semper religiosē seruauit: pacta & promissa rescindere, fidem datam immutare, semel alicui destinatum honorem, vel beneficium ad alterum transferre; æquē insolitum illi fuit ac iurisiurandi Sacramentum irritare. Audiebat Isocratem prudenter Regem Nicoclem admonentem: Omni studio contende, ut tuis verbis maior sit fides, quā aliorum iuramentis. Animo reuoluebat Sacram Dei ipsius vocē apud Zachariam vatem: *Vnusquisq; malum contra amicum suum ne cogitetis in cordibus vestris, & iuramentum mendacij ne diligatis; omnia enim hæc sunt, quæ odi, dicit Dominus.* Meminerat quā acerbis, iustas tamē pœnas subierit Domus & Familia Regia Saulis, ob violatum ab eo datū populi

pulis Gabaonitarum, per Iosue Ducem Hebræorū, iusiurandum ob ademptum agrum, occupataq; cōtra datam fidem Oppida, ob eādem per Saulem factam, Septem ipsius nepotes Regius sanguis, patibulo publicè affixi, pependerunt; & per summam immanium cruciatuum acerbiter, non suā sed Maiorum suorum culpā contractum scelus, & sacrilegium, expiārent. Viderint ceteri Principes, ludere iuramentis assueti, quid vel ipsis, vel eorum posteritati immineat, quibus pœnis teneantur, quibus tormentis aliquando tandem, impiā expiaturi sunt sacrilegia, etiam si nunc exultare videantur in scelere; etiam si perfidiæ suæ palam iactent stratagemata; etiam si prospero successu ferantur, & per summum nefas occupent aliena Imperia, sanguinem Christianū atrociter fundant; sacratas Deo Aras, Tempia, adiutq; Sacrorum sacrilego incaſtent ausu, eaq; omnia impunè se perpetrare gloriantur: vna veniet dies, vna hora, vel potius minimum labentis tēporis momentum, cum hæc omnia inanis gloriolæ & impiæ iactantiæ falsa ornamenta, istis Trasonibus, sanguine Christiano saginatis, triste & supremum adferet exitum. Illinè qui nunquam Christiani nominis hostem in acie viderunt? qui pedem domo, nisi ad infestandas Christianas Prouincias, ad accipienda occupandaq; Regna non extulerunt? qui quotidie impias societates, impia fœdera, cum Turcis, cum Barbaris feriunt, vt eorum rabiem in Christianos accendant, suamq; tam turpi subsidio Tyrannidem stabiliant? Illinè, inquam, quidquam veræ laudis, veri de-

coris

coris sibi, etiam si integra laudatorum ad adulationē compositorum agmina aduocet, vsurpabunt? Sed nos ad nostra redeamus, atq; ab Iustitiā ad Clementiam transitum faciamus. De quā vt aliquid dicerē, cum multa præclara eius virtutis specimina, quæ in omnibus SIGISMUNDI actionibus enituerint, tum vel maximè vna eiusdē Regis vox me impulit. Nam cum errore quorundam, Regis Imperium fastidientium, ad arma ventum esset, aciesq; eunti Regi, sub nomine eorum, qui tum libertatis patronos se ferebant, structa & armata opponeretur: acri, sed breui prælio res confecta fuit, paucis cæsis, reliquis aduersarijs in fugam actis. Suadebant nonnulli è fuga retrahendos eos, qui Principes eius erroris erant: Sed Rex, absit hoc inquit, ne dum paucos noxios confectamur, innocentes multi pereant. Digna sanè vox quam omnes Reges, omnes Principes audirēt; quæ in pectoribus eorum, qui cæteris præsent, figeretur. Vox pietatis, vox clementiæ, vox mansuetudinis. Nemo eorum, qui in aduersā acie steterant, erat, cui non hostilis esset in Regem animus, cuius non parricidij rea mens, qui non primus hastam aut gladium Regio sanguine tingere cuperet: omnes tamen Regio ore, parricidij scelere exoluti, omnes pronūciati innocentes; non quia nocere noluisent, sed quia non potuissent. Certabatur adhuc, & bellum ferebat, fugiebant hostes, mox bellum renouaturi: sed SIGISMUNDVS & iniuriæ, & periculi immemor, memor clementiæ, fisti acies iubet, militem ne Ciuem feriat, ne capita aduersariorū præcidat, seueris cohibet

cohibet iussis. Commemorare possem multa alia, eodem temporis momento, Regiæ clementiæ argumenta, eos qui pessimè erant de Rege locuti, qui scriptis eius nomen lacerarunt, qui ante ipsum conflictum in pectore Regio se defixuros hastas promiserant, captos, & in potestatem Regis redactos, non solum honestè habitos, verumetiam statim dimissos; omnium quicumque in acie ceciderant humata corpora: his qui aut vulnera acceperant, aut vestibus spoliati erant, nihil defuit; nam & Medici præstò erant, & Rege auctore, milites passim detractis sibi vestimentis, necessitati spoliatorum subueniebant. Dies quidem illa, quâ pugna commissa est, funesta bonis omnibus, tristis admodum ipsi etiam victori SIGISMUNDO esse poterat: sed ad immortalitatis gloriam, ad famam inauditæ clementiæ eidem conciliandam, maximè accommodata. Vicit SIGISMUNDVS, non armis sed clementiâ; remisit iniurias, omnem animi offensam deposuit, cunctos ad gratiæ suæ sinum admisit, duobus non postremæ notæ, qui dissensionis illius Ciuilis, veluti quidam litui erant, non solum erroris veniam dedit, verumetiam alterum ex ijs, summis excoluit honoribus, alterum si superuixisset, si non vitæ summa brevis spes ipsius præcidisset, non minoribus honoribus, & dignitatibus aucturus, ornaturusque. Tanta quidem huius virtutis laus est, ut Romanæ Eloquætiæ Parens meritò dixerit: Homines ad Deos nullâ aliâ re propius accedere, quàm salutem hominibus dando. Quam multos SIGISMUNDVS REX suâ clementiâ flexit, ut cum prius Regiis actioni.

actionibus & destinatis obsisterent, mox mutato animo, eidem adhæserint, præclarosque ipsius pro Republ: conatus, studio operâque suâ adiuuerint. Verecundiam enim (inquit Seneca) facit ipsa clementia regentis. Utque frequentia eorum, qui sub curâ & manu Medici salutem quærunt, funera Medico dedecori sunt: sic Principi quotidiana odia subditorum. Sacra quidem Scriptura, Regis thronum clementiâ & misericordiâ roborari: verissimè asserit. Et Seneca errare eum dicit, qui existimat tutum ibi esse Regem, ubi nihil à Rege tutum est: securitas, securitate mutuâ, paciscenda est. Vnum est, inquit, idemque inexpugnabile munimentum, amor Ciuium. Quid pulchrius quàm viuere optantibus cunctis, & vota non sub custode, sed palam nuncupantibus? Optimè Agasides Lacedæmoniorum Rex, cui dâ quærenti, quomodo tutò siue satellitibus regnare posset, respondit: Si ita popularibus imperet; ut liberis Pater. Quod si clementia Ciuibus grata est, quid si eadē conspicitur hosti præstita, quantam admirationem in animis hominum excitat? Suiscius qui summam rerum in Moschouia tenuit, captus, & ex dignitate personæ vnâ cum fratribus honorificè habitus, cum fato diem extremum obiisset; vita functus non sepulchro, sed Mausoleo à SIGISMUNDO victore, victo hosti magnificè erecto, illatus, & ad perpetuam clementiæ memoriam condecoratus est. Non attingam cæteras virtutes, non quod existimem eas Regio decori non conuenire: sed quia ita in omnibus SIGISMUNDI actionibus fulsere, ut vel inimicorum perstringerent oculos. In maximis quibusque periculis, in ipso vitæ discrimine, nullus vnquam cum vidit ita commotum, ut serenitatis vultum.

C

immu-

immutaret, ut non ab animi præstati magnitudine cōsiliū sumendum censeret. Monitus in prælio Guzo-
uiensi, ut perturbatā dextrę partis exercitus acie, ad le-
uā quæ immota stabat, signū Regium transferret, Du-
cibus idem suadentibus; constanter vultu renident, ne
ad vnum quidem palmum terræ, loco quem ceperat se
mouere voluit. Ad Lincopiam in Sueciā, arte Caroli
circumuentus, & à Suecis desertus, cum paucis qui fidē
seruauerant, Regemq; & Polonos, pro Rege mori pa-
ratos, & vitæ discrimen, non multitudine hostium, sed
virtute suā metiētes, nō deseruerant, vrgente Carolo,
pugnæ copiā fecit, atq; in primā acie, quę tormentorū
ictibus petebatur, stetit interritus; multitudinēq; hosti-
um & impetū longe maioris exercitus, virtute sua su-
stinuit. Nec illud silentio transmittere possumus, cum
SIGISMUNDVS sub alterū ex Sueciā discessum Calma-
rien: portum peteret, viq; ventorum naus, quæ Regē
vehebat, in breuia adacta & inuersa fatisceret, pericu-
lumq; esset, ne compagibus solutis mergeretur; cimba
vna superfuit, qua Rex ad littus euadere & salutē suā
consulere posset: quam cum esset conscensurus, & ali-
quot vel timidiore vel audaciores in eādē se demit-
terent, vnusq; ex ijs quibus Regiæ salutis cura deman-
data fuit, strictis armis ab excensu eos arcere vellet;
Desine, inquit Rex, & vnūquēq; salutē suā, quam qui-
uis tantæ æstimat, quanti & ego & vos meam æstimatis,
consulere. Quid memorem alia? Magni quidē momē-
ti negotia semel aggressus, nūquam deseruit, metu vel
terrore denunciati etiam periculi: sententiam nunquā
mutauit; obstinatiores alijs visus, sed virtutes eius expen-
dentibus, fuit semper constans & inuictus. Quidni ta-
lis esset?

lis esset? qui non solum hostium, sed quod præstantius
merito habetur, sui ipsius semper victor extitit. Legi-
mus, magnos Reges, & sumos Imperatores, expugna-
tis victisq; hostibus, per summū dedecus, libidini & in-
temperatiæ succubuisse. David Rex, nisi adulterio do-
mum alienam polluisset, sine vlla exceptione ipsius Dei
ore laudari potuerat. Ad Ticinum, ad Thrasimenum,
ad Cannas, Hānibal toties Romanorum victor; Capu-
anis mollioribus hybernis, concidit. Alexandrum Ma-
gnum, post deuictum orbem propē vniuersum, Baby-
lonicæ illecebræ occiderunt. Eandē ob causam amissa
Regna, euersa Imperia, excisas Vrbes, nulla ætas fuit
quæ nō viderit; nulla natio quæ tristi experimento nō
fenserit. Sed non sensit, regnante SIGISMUNDO, Polo-
nia: purus castusque, & ab omni illecebra inconcessæ
voluptatis alienus, etiam iuuenis vixit: iuuenis inquam
ætate & formā præstantissimus, natu longē maioribus,
puritatis castitatisq; exēplo, præiuit: virginis in Regio
vultu nitor, in sermone verecūdia, in omni actione in-
genus pudor, Ciuibus externisq; eum admirādum &
venerandum exhibebāt. Facilius crescit quā inchoa-
tur virtus. Summum fuit in SIGISMUNDO prima nascē-
tis ætatis crepundia castitati consecrāsse, eo iacto fun-
damento, cætera creuerunt, & felicissimē adhæserūt:
casto castissima obtigerunt matrimonia: rara ea pro-
speritas, & rarō visā. Pudet paulō ante præteriti tem-
poris; viderūt certē Patres nostri ab Augustā Domo,
duas Reginas huc deductas infelicitē nupsisse. Vidi-
mus nos eadē Familiā ortas, Imperatorij sanguinis du-
as Heroides, pias, pudicas, optimas, sanctissimas, quæ
non modō dum viuerent, admirationem quandā in a-
nimis

nimis nostris excitârunt, sed etiâ tantâ relictâ prole, iâ
 vitâ functâ, suâ fœcunditate, ne amplius dicâ, vt melius
 sperare in posterû possimuseffecerunt. Optimus Ma-
 ritus SIGISMVNDVS: optimæ priori Vxori, par successit
 secunda: eadē vtriq; virtus, eadē fœcunditas; idē erga
 Maritum amor, eadē obseruantia: ex vtrâq; Vxore su-
 scepi Liberi, ita educati formatiq;, vt eodē vtero editi
 videantur. Grandishæc felicitas, & vix aliquândo audi-
 ta, è duobus Matrimonijs natos ita cōaluisse, & ad cō-
 mune decus promouendum cōspirâsse; nullum æmu-
 lationis, nullum ambitûs, nisi qui Fratri natu maiori ad
 Regnū aditū patefaceret, vestigium. Quatuor Fratres
 summo & ipsi loco, digni Regis Filij, in frequētissimo
 Ordinum confessu, in publico Electionis Conuentu,
 Fratris causam egerunt, orârunt, impetrâruntque. Tā-
 tam concordiam, tantumq; ad cōmune bonum cōsen-
 sum, vix vnquam vlla vidit ætas. Fateamur necesse est,
 bono Reipub: natos; nec grauem esse nobis hanc pro-
 lem, quæ licet numerosior videatur, quadam tamē sin-
 ceræ concordie vnitate ita cōaluit, vt omnes quales
 olim Geriones in Hispaniâ fuisse non temerè antiqui-
 tas finxit, vnâ animâ viuere existimari possint. Horum
 virtuti quid vnquam arduum aut difficile esse poterit?
 His Regna, his amplissima debentur Imperia: illorum
 patrocini, illorum tutelæ aliquando orbis vniuersus,
 partâ deuictis Barbaris salutem acceptam feret, & ve-
 luti mōstrorum domitoribus, honores æternum mæ-
 furos decernet. Sed nos paulò altius euecti vela cōtra-
 hamus, & ad nostrū redeamus SIGISMVNDVM, quē di-
 uinitus Reipubl: nostræ datum, si quis & conditionem
 illorum temporum, & Interregni, quod Diui Stephani
 Regis

Regis mortem subsecutum est, turbulentissimū statū,
 animo diligentius expēderit, facile agnosceret. Vt cæte-
 ra silentio prætereâ, in ipsis Electionis noui Regis Co-
 mitijs, binæ acies infestæ sibi; altera viribus ferocior, &
 externo milite ad opprimendâ patriâ conducto arma-
 ta; altera causâ melior, in cāpo steterunt: summū peri-
 culum erat, ne orbata tutore & Rege Patria, Ciuilibus
 armis discerperetur: aliquoties instructis exercitibus,
 iâ iam congressuros, secreta quædam fati vis, à mutuo
 exitio coercuit. Candidati Regni vacantis, ex præci-
 puis Orbis Christiani familijs comparebant; crescebat
 in dies ambitus, ingentes commoditates & vtilitates, ijs
 qui Regnum sibi deferri petebant promittētibus; ple-
 risq; etiam, heu dedecus patriæ! quâ spe, quâ præmijs
 allectis, operâ suam ad perniciem patriæ externis Prin-
 cipibus pollicentibus. Leuiori manu SIGISMVNDI causa
 primò agebatur; & Legati eius, nā ita Pater mandaue-
 rat, materna potius iura repetebāt, Electionis præroga-
 tiuâ cæteris cedere, aut saltē non multū obniti videbā-
 tur: nullo fructu, & nulla propē spe felicioris successûs,
 cōsilia tractabantur: vis & arma in Comitio valebant;
 homines pacis & concordie cupidi, prodire in publi-
 cum, vel nō poterant, vel nō audebant. Nō deerant qui-
 dem nōnulli, qui in SIGISMVNDVM propēderent: Regina
 Anna eius Mater tera, non obscurè illi suffragabatur:
 Domûs Iagellonicæ propē vltimus surculus, Diui SIGI-
 SMVNDI Primi nepos, Regis AVGVSTI Sorore natus, in
 ore omnium erat. Sed reputantibus alijs, quantum ille
 opis & auxilij, contra potentissimos cōpetitores, quos
 bello & armis quaecunq; ius suum vrsuros apparebat,
 esset allaturus; metus quidem obuersabatur oculis, ne si

iuuenē, adhuc nullis maioribus fultū viribus, Regē dicere, aduersariorū potentiae succumberent. Magnus ille Ioannis Zamoiscij, Magni Cancellarij, & Exercitū Regni Supremi ducis animus, & mens tantæ molis capax, rebus fluctuātibus ac penē perditis remediū attulit. Nāq; is suis, quas in vsum Reipubl: parauerat, aduersariorūq; viribus ac copijs expēsis animaduertit, minimā popularitatis & communis fauoris accessione, ijs qui externis freti auxilijs minabātur, vim intentabant, se si nō superiorē, certē parē futurū; eorūq; audaciā & temeritatē facile repulsurū; inito cū Stanislao Karnkoui Archiep: Gnesnen: Regni Primate, cū quo ceteri Episcopi, vno aut altero excepto, idē sentiebāt, & cæteris Senatoribus, quibustemerarij aduersariorū ausus displicebant, consilio; ex omniū sententia ab Archiep: Gnesnensi, quē inter præsidia sua, ne vi armatā ab instituto prohiberetur, receperat, more institutoq; Maiorū, SIGISMVNDVM REGEM renunciandū curat. Audito SIGISMVNDI nomine, noua quædā lux affulgere visa; pauere aduersarij; assurgere animis ijs, qui bonarū partium erāt; vniuersa expers factionū Nobilitas, suffragiū huic vni deferre. Videres nuper in seffos milite cāpos, vexillis pacis & trāquillioris spei impleri; omnes nomē SIGISMVNDI occinere, omnes eius auspicijs insigniri. Itū est Cracouiā, & hæc Vrbs in quā Reges Poloniae auspiciatō Imperia ordiri solent, iustis munita præsidijs. Viueres etiā nūc Zamosci, fatereris profecto, id quod fæpius testatus es, te in omnibus concertationibus, in omnibus prælijs SIGISMVNDI REGIS fortunā fretū, pro Patriā caput tuum omnibus obiecisse periculis. Non dū illum videras, cū Germanicas legiones Cracouiæ immi-

imminentes cecidisti, reliquos in fugam egisti, Vrbem Regiam obsidione soluisti, SIGISMVNDI deinde Cracouiā ingresso, & feliciter coronato, tu iterum cum exercitu profectus, Archiducem Maximilianum, Imperatoris Romanorum Filium, Imperatoris Fratrem, in finibus Silesiæ vires reparantem, & iam præter Germanos & Polonos, Hispanicis ac Hungaricis copijs auctum, supremūq; exitium Patriæ minitantē, ad Byczynam assecutus, acri quidem & difficili, sed felici tamen commisso prælio, vicisti, debellasti. Archiducem ipsum, cum præcipuis quibusq; magni nominis viris, deditione in SIGISMVNDI potestatem redeigisti. Longum esset recensere omnia: per occasionem attingam nonnulla. Quantæ molis erat eo tempore Regnum Poloniae capessere, quæ domi forisq; imminebant pericula, animus ipse meminisse horret. Vniuersum Regnum in diuersas scissum factiones, iuuenili (nam SIGISMVNDVS cū Rex legeretur vigesimum primum ætatis annum agebat) consilio restaurari, & tam dissidentes voluntates Ciuium ad concordiam reduci posse, quis crederet? Iuuenis, vt dixi, erat SIGISMVNDVS, mores & instituta nostra nōdum nouerat; multorum consilijs, dum sibi quisq; studet, distrahebatur: sed inerat animo illius plus quàm humana prudentia, Rege Magno digna modestia, virginei pudoris decor, religio, pietas, Deo imprimis, tum & hominibus amabilem illum reddebant, omnibus eius actionibus, felices ac prosperos conciliabant successus. Itaq; intra vnius anni decursum, & cum Serenissimā Domo Austriacā, cū summā Regis & Regni digni-

tate trāfactum, dimissoq; Archiduce Maximiliano, pax constituta, amicitia etiā perpetuò duratura sancita, & ijs qui ad Austriacos fauorem in Electione flexerant, venia erroris, Regis clementia, ac publico Comitiorum Regni decreto, data. Sic concordia, sine quā Regna esse & stare non possunt, stabilita firmatoq; Imperio, eam de se excitauit SIGISMUNDVS opinionē, vt ipsis inijs felicissimos Regiminis sponderet successus. Frustra minis, & bellico apparatu, terrere eum voluerat Turcarum Imperator Amurates III. Nam per Tartaros bellum orsus, mox expertus est, non cedere animo SIGISMUNDVM, sed paratum esse, vel in ipsius hostis ditionibus, quærere hostem. Cessauit illa procella, & cæteri vicini ad pacis studia animos flexerunt; pactæ cum Moscho induciæ; firmata cum Turca pax; Suecia deniq; morte Ioannis Regis Patris iure ipso naturæ & successionis beneficio accesserat Imperio SIGISMUNDI: ritè institutoq; maiorum Regni illius paterni & hæreditarij habenas capeffiuerat, iusiurandum à Suecis seruandæ fidei acceperat, pari Sacramento se eisdem obstrinxerat. Felix erat Suecia tali Rege, tali pace: sed ambitio & Regni cupiditas corrumpit omnia. Carolus, Regis Patruus, per eius absentiam, primò leui manu attrectare cepit clauum Regni: mox totum ad se traxit Imperium, per summam impietatem abdicato Nepote. Hinc bella in Liuoniā, quam Carolus inuaserat, orta; & per aliquot annos satis à nostris feliciter gesta. Fugatus aliquoties Carolus; in Kirchholmēsis verò campis, virtute Caroli Chodkieuicij, Supremi pro Magno Ducatu Lithuaniae copia-

copiarum Ducis, ita cæsus vt penè vniuerso amisso exercitu, vix ipse fugâ euaserit. Sed nihil acerbius SIGISMUNDO erat, quàm strictos in sua viscera vertere mucrones; gentem in quā & ex quā natus est, alieno errore à se abductā, bello persequi: itaq; quantum potuit, quantumq; illi licuit, à supremā vi abstinuit. Hinc aduersæ partis creuit audacia, & Carolus malè partum Regnum, filio suo Gustavo, olim poenās violati familiæ suæ domestici foederis daturus, iniquè possidendum reliquit. Cætera vt successerint, vt in Liuoniā, vt in Prussia, & quo cunctu bellatum fuerit, res tanquam nuper gesta, hæret in recenti omniū memoriā: & Gustauum cladis aliquoties acceptæ, bisq; ictu sclopeti propè lethalibus vulneribus cruentati sui corporis, putodum viueret nō fuisse oblitum. Inuitus hæc commemoro, gratiora illa, & magis pleno prædicanda ore, quæ SIGISMUNDVS in vindicando iure Regni, ac interceptis ab hoste Moscho Prouincijs repetendis, summa cum laude feliciter gessit. Gens feritate barbara, religione superstitiosa, fide ambigua, nec magis rebus quàm suo cælo, suo sidere armata, quæsitum Maiorum nostrorum sanguine Reipublicæ patrimonium, fraude & prodicione interceptum inuaserat. Non annos, sed secula acceptæ immanis iniuriæ numerabamus; penitus iam ea macula infederat in animis nostris: nec immeritò existimabamur bellicæ laudis & decoris possessione, cessisse hostibus. Diui Stephani præclaros quidem & prosperos conatus, mors inopina interuerterat. SIGISMUNDVM ne statim à suscepto

D Regno

Regno bellum aliquod ordiretur, quorundam nimium pacis amantium consilia arcuerant: quanquam & ille eo semper esset animo, ut existimaret Regiū esse, nec prouocare bella, nec timere. Extincto per summum scelus tanti Imperij vnico reliquo hæredo Demetrio, summam rei ad se traxerat Hodunus, homo in Moschouia non magno loco natus. Fraus diu latere non potuit, exitit vltor ficti nominis Demetrius, ad cuius famam Hodunus scelere vecors, nefaria innoxii pueri cæde pollutus, excidit Imperio. Nec impostoris diuturnum Regnum esse potuit, quamuis ut id stabiliret, quorundam Polonorum auxilijs niteretur. Pepigerat dum in Polonia esset Marina Georgij Mnizek, Palatini Sendomiriensis: Filia nuptias, statimque rerum in Moschouia potitus, publico Procerum, ut gentis mos est, consensu, expediuerat in Poloniā Legatos, qui & à Rege & à Patre sponsam dari peterent, eamque in Moschouiam honorifice deducerent, Regem ipsum, & plerosque Proceres, sponsæ cōsanguineos, ad nuptias inuitauerat. Rex per Legatos officio functus; reliqui eo profecti, magis ad nuptias, quam ad bellum: neque enim aliqua fraudis subesse poterat suspicio, publicæ fide, publico vniuersæ eius gentis adsensu interposita. Ut rem in pauca contraham, in ipsis nuptialibus sacris, Mosci authore Suilcio conspiratione facta, tumultuque excitato, illum ipsum Demetrium suo arbitratu strangulant. Dicant sanè ij iure à se factum, Tyrannum impostoremque sublatum. Sed quid innoxii meruerant hospites, in quos immani

seuitum

seuitum est cæde? Legati Regij, iure gentium sacri, cur arctâ & infami circumdati custodiâ? Erat ea iusta belli causa, & vltor poscebatur, qui & atrocissimæ vindex esset iniuriæ, & iniquè ac nefariè à Moschis vsurpata iura repeteret. Sed ne quid temerè aut inconsultò fieret, missi qui iniuriam nomini Polono factam; qui Legatos violatos quererentur; qui denique res & homines interceptos clarè repeterent. Hi quoque sine honore habiti, & serò admodum dimissi: itaque quod iustis rationibus obtineri non potuit, bello & armis repetere visum. Arx Smolenscensis nostri olim iuris, obsidione cincta, immissus in remotiores Moschouiae Prouincias miles, cæsi hostiles exercitus, deditio in potestatem redactus Suilcius, Regia ipsa Moschouiae Vrbs, milite Polono infesta. Tu VLADISLAE PRINCEPS, omnium eius gentis consensu Rex & Imperator lectus dictusque, in tuâ fidē tota videbatur venisse Moschouia, Smolenscum denique captum: tam magni momenti, & tam præclaræ res biennio confectæ, & totus triumphatus Septētrio. Cur deinceps versâ retrò fortuna fuerit, fidesque parum fidæ gentis nutauerit, magis filere libet, quam vulnera Reipublicæ parum gratâ manu attrectare. Manet tamen, manebitque semper inclyta memoria clarissimarum SIGISMUNDI REGIS victoriarum, quibus & ius Regni asseruit & inolitam opinionem, quasi eius gentis potentia nobis formidabilis esse posset, penitus ex animis omnium exemit. Quid ego alia bella & prælia commemorem? coërcitam Nisouij militis sæpius licentiâ: octies aut

amplius fusos fugatosq; excussa quam raptim egerant prædâ, Tartaros: Michaelē Transylvaniae Moldaviaeq; Principem, multarum gentium victorem, qui Turcicae etiam potentiae imminere, & formidandus esse videbatur, victum, & Moldaviâ exactum: Aaronem Valachia pulsum: Domui Mohilanae, in Valachia & Moldaviâ armis ius assertum? Hactenus quidem vis Turcarum ita illibata steterat, ut posteaquam illi arma & Imperium in Europam transfulissent, in omnibus ijs praelijs, quibus ipsi eorum Ottomanicâ stirpe orti Imperatores præfuerunt, semper victores evaserint. Sigismundus Imperator, idemq; Hungariae & Bohemiae Rex, coniunctis cum Ioanne Duce Burgundiae viribus, primus arma Turcica, maiori quam ullus unquam exercitu, ad Nicopolim irritare ausus, tam tristi pugnavit euentu, ut & Burgundus in potestatem barbari hostis venerit, & Imperator uniuerso amisso exercitu, vix piscatoria exceptus scaphâ, ignoratus quis esset, solis latebris tutus, turpi fugâ euaserit. VLADISLAVS IAGELLONIDES noster, & Hungariae Rex, ingentis animi iuuenis, prospero quidem aliquoties successu bella Turcica tractauit: sed postremo Amurati Turcarum Imperatori ad Varnam congressus, etiam si initio pugnae barbarorum agmina cecidisset fugassetque, ipseque cum delecto Polonorum robore, in primâ acie versaretur, ac ipsum Amuratem voce & manu posceret, & iam acinacem in eum stringeret, concursu praetoriani militis oppressus, iam penè victor, & in ipsâ victoriâ Regium effudit spiritum. Solimanus

limanus in campis Mohacenfibz, Ludouico Rege Hungariae caeso, septies circiter fortunam belli cum potentissima Domo Austriacâ, quæ statim à morte Ludouici, possessionem Regni Hungariae adire contendit, experiri voluit: sed nec Buda intercepta, nec Vienna obsidione cincta, nec deleti aliquoties Germanorum exercitus, elicere potuerunt Potentissimos Germaniae & Hungariae Reges, qui viuente Solimano vixerunt, ut in campum & aciem descenderent, ut pugnae copiam facerent. Nostra memoria Archidux Maximilianus, Rudolphi Imperatoris, Fratris sui auspicijs, & trium Exercituum, Germanici, Hungarici, & Transylvanici, virtute ac robore fretus, cum Mahumeto III. qui paulò ante Agriensem Arcem, hactenus inexpugnabilem creditam, vi expugnauerat & ceperat, ad Cheresstessum signa conferre ausus, iam vicisse videbatur, nisi Tartarorum audaciâ circumuenti Christiani milites, cum se & à tergo & à fronte peti, cædiq; viderent, solutis ordinibus, loco moti, hosti victoriam concessissent. Scilicet non erat in fatis, ut gloriam victi aut coerciti Turcarum Imperatoris quisquam alius delibaret: integra & solida SIGISMUNDO REGI Poloniae seruabatur. Tu quoque VLADISLAE PRINCEPS arcano Dei decreto destinabaris, ut in partem huius gloriae & fortunæ venires. Nunquam certè maiori vi uniuersa barbaries cospirauerat in perniciem rei Christianae. Iuuenis admodum, Princeps, & odio fidei Christianae, & immensâ gloriae cupiditate incensus præcipiti ambitione ferebatur, in eamque venerat

opinionem, vt primo impetu se nomē Polonorum deleturum arbitraretur. Somniabat deinceps alia Regna, alia Imperia, & Poloniā armis in suam redactā potestatem, nullos Europæ angulos, nullos recessus sibi non peruios, nullam Urbem, nullam Arcem, nullum munimentum suis viribus non cesserū rebatur. Eā impotentis & ferocis animi audaciā elatus, ad Europæi militis quem ex omnibus Proincijs & præsidijs euocauerat, experta maiorum suorum bellis robora, Asiaticos, Africanosq; exercitus adsciuerat: quadringenta equitum peditumque millia numerabantur. Aderat Tartarorum Imperator, centum viginti millibus comitatus, & ad longè latèq; spargendam vastitatem, incendia & cædes miscendas, instructus paratusque. Tres integros annos ad parandum bellum aula Turcica impenderat: nulla alia tanto temporis spacio. Purpuratos Osmanicos magis cura torserat, nisi vt quisq; paratissimus compareret: tantā armorum copiā, is belli apparatus, tot maiora ad quatiendos muros, tot minora ad campestrē stragem edendam ænea tormenta, in exercitu erant, vt si quis ea recensere vellet, fidem eorum qui hæc non viderunt excessurus putaretur. Tantæ moli impendentis ferocissimi belli quid opponeret SIGISMUNDVS, aut quam opem imploreret, quem in societatem periculi adscisceret? Æstimantibus certè eius temporis Reipubl: Christianæ statum, ingens quidem supremi exitij discrimen apparebat: spes verò prosperioris successus nulla affulgebat. Summus Pontifex opis non multum, Preces & Vota

& Vota, sub quorum patrocinio tuto constitit, salus nostra libenter deferebat. Ferdinandus Imperator domestico implicatus bello, de summâ rei incertamen trahebatur: vniuersa Domus Austriacæ potentia nutare videbatur. Galliæ Rex, cuius inuicti Maiores militaris gloriæ decus potissimū bellis Asiaticis nomini Gallico, & posteritati suæ paraue-
rant: nihil bella aut pericula Turcica ad se pertinere aiebat. Hispanum res Austriacæ Domus in Germania minus secundæ distrahebant. Archidux Austriae Albertus, pro Rege Hispaniæ in Belgio summâ cum potestate Gubernator, in ipso vitæ exitu, quantum Reipubl: Christianæ euperet, quantopere communi periculo commoueretur, luculentâ animi testificatione declarabat, & se ea omnia quæ in sua essent manu facturum ostendebat. Reliquorum Principum Catholicorum fauor in aperto, subsidia in obscuro, vel nulla, apparebant. Ex ijs qui de religione Christianâ, aliter quàm Orthodoxa & vniuersalis Ecclesia Romana docet, sentiunt; solus Sereniss: Iacobus Magnus Britaniæ Rex, vidit periclitâte Poloniâ vniuersam Reipubl: Christianam in summū venire periculum; solus ad ferendam opem, studiū operamq; suam detulit: solus peditum lectissimorū cohortes, in suo Regno conscriptas, & suo stipendio auctoratas mari expediuit; & venisset ea manus satis opportunè, nisi in portibus Danicis fuisset retenta. Reliqui omnes eius sectæ Principes, gauisuri etiam interitu nostro credebantur. Gustauus certè Suecorum Rex, non aliter ac si crudelissimi Turcarū Tyranni iuratus satelles, ac Mahumeticæ impietatis pro-
motor

motor esset, tum vel maximè nos oppugnabat, nobilq; perniciem & seruitutem à ceruicibus Christianorum arcantibus & amolientibus: ille per eam occasionem Rigam, totius Liuania Ciuitatem primariam, & portu nobilem, expugnabat; Liuiam iuris nostri Prouinciam, cæde & incendijs vastabat. Nihil dico quo in statu tum res nostræ essent, accepta superiori anno in Valachia clades, alter è Ducibus captus, cæsus alter, veterani militis flos & robur vno prælio concidisse videbatur. Quis non attonitus stuperet, SIGISMUNDVM REGEM, sola Diuini auxilij fiducia fretum, neq; tantis quæ imminebant periculis, vel motum, vel territum, sed maiora quàm quisquam suspicari posset ausum, Heroici animi magnitudine, hostibus perniciem, Patriæ salutem, sibi immortale decus, peperisse. Summâ celeritate scripti paratiq; exercitus, non ij quidem à quibus victoria sperari posset, sed qui potentissimi hostis ferociâ morarentur: & ille Bizantio profectus, adeò celeri cursu difficillima Thraciæ itinera superauit, vt longè citius, quàm sperari potuerat, traiecto Istro, in ipsâ constiterit Valachia; mox viribus cum Tartaro cōiūctis, pari celeritate ad fines Poloniæ properauerit. Sed iam Chodkieuicius, cui summa rei commissa fuit, iam Stanislaus Lubomirscius, Polonicarum copiarum ductor, ambo magni viri, ambo bellicis facinoribus illustres, fines quibus Valachia à Polonia diuiditur, transgressi, in hostico ad Chocimum, audaci sed felici consilio Castra posuerant. Tu quoque **SARENISSIME REX**, paulò post Paternorū tuorūq; quibus

quibus te superni fauores circumdabant, auspiciorū felicitatē Castris, eo à Patre missus, intuleras, omnium in te oculos conuerteras, animos fessis, & deuentu sollicitis addideras, hosti qui te venisse statim sensit, metum incusseras. Interea dum Pater maiori vi bellum molitur, totiusq; Regni robore excitato, vniuersam in aciem ducit Poloniam: res Tuo ductu, Tuâ felicitate præclarè gesta; infestatæ diurnis nocturnisq; incursionibus Turcicæ stationes, sæpius hostis iusta acie fusus, sæpissimè ab oppugnatione Castrorum, cum ingenti clade reiectus, cum semper deteriori conditione suos intra munitiones recipe- ret, postquam SIGISMUNDVM propè iam adesse intellexit, spem quam capiendæ expugnandæque, & in suam potestatem redigendæ Poloniæ conceperat, deposuit. Videbat supra sexaginta millia suorum militum, qui cæteris audentiores fortioresque putabantur, ferro cæsa; longè maiorem numerum belli & temporis incōmodis absumptum; iumēta omnia corrupta; stratos hominum equorumq; cadaueribus campos: Deniq; venire SIGISMUNDVM, felicissimū magnorum bellorum confectorem, se victum, fassus, irritosq; suos conatus, quod nulli vnquam Turcarum Imperatori accidit, deplorans; condiciones quibus bellum finiretur, accepit; prior Castra mouit, vt nostris signa victricia & arma tenentibus, tergo abeuntis, & impedimenta deferentis hostis, gloriosè illudere licuerit. Sint, vt fortasse non desunt, qui partæ eo bello gloriæ detrahant; qui virtuti SIGISMUNDI REGIS obmuffitent; prodeant, & aliquem

E vnum

vnus Christianum Principem, vel Imperatorem proferant; qui Turcicas vires tam audacter fregerit; qui ab aditu Regni ferocem Tyrannum tā feliciter arcuerit; qui ne vnico quidem terræ palmo, eum qui semper, vel integra Regna, vel munitissimas Arces, expugnare & intercipere solitus fuit, ditionum suarum potiri permiserit; qui hostem vincere assuetum, vinci posse tam prospero successu docuerit; qui deniq; tot barbarorum millibus deletis Turcarum, victoris titulū magis verè vsurpare possit. Dixi paulò ante, hoc decus SIGISMVNDI REGIS, & nemini alteri commune esse & fore: dico iterum eandem deuicti Orientis laudis hæreditatē inclyto eius sanguini deberi, ad cuius nomen vniuersa horret barbaries, quibusdam, ijsq; non obscuris, coniecturis sibi inde exitium imminere prospiciens. Sed quid agimus? oblitividemur præsentium, rimari futura? Reuocat nos ad se SIGISMVNDVS REX, tristi quidem & lugubri funeris sui pompâ, pares animorum affectus merito à nobis exigens; cæterum morte felici, & bonis omnibus exoptando exitu mentes nostras exhilarans. Nam vt nullus vnquam hostis vidit SIGISMVNDVM, dum vixit, vel periculo pauentem, vel supplicem; ita & ipsa supremi fati necessitas, promptum paratumque eum reperit ad parendum Diuinæ voluntati. Iam penè corporis vires omnes conciderant, iam inualecentē vi morbi hebetati sensus ægrè sua munia obibant; viuidae tamen mentis, vigor idem erat; sermo nullus nisi cum Deo, aut de Deo; vultus securæ & innoxie mentis testis; tota

corpo-

corporis honestissima cōpositio, nullo mortis metu eum terreri, nullis dolorum, acerbitatibus vinci & frangi, testabatur. Sic cessit è vitâ, vt ij qui ab exilio redeunt in Patriam, lætus hilarisque. Semper quidem, dum vixit, toto animi conatu contendit, vt in hūc supremi exitus casum paratus esset: cæterum cum eum imminere sentiret, nullos alios vel libentius vidit, vel facilius admisit, quàm eos quibus cum vitæ & salutis suæ rationes cōferre solebat: has quoque moriens ita acuratè expendit, vt si Christianæ modestiæ immemor foret, liberè dicere potuisset, quod olim Titus Vespasiani filius, se nullius sceleris consciū cedere è vitâ. Nos certè id de eo credere conuenit: namque Christiano ritu, vt S. Ambrosius scribit, decedentibus, optima voluntas & desiderium sufficit. Habet gratiam Valentinianus, vel nos dicamus SIGISMVNDVS, quā desiderauit; habet, quod poposcit; certè quia poposcit accepit. Nullius itaque errati, quod non lachrymis eluisset, cuius veniā à conditore suo nō poposcisset, SIGISMVNDVS sibi conscius, cessit vitâ. Prosequamur illum iisdem votis, quibus S. Ambrosius Valentinianum suū, si quid Orationes nostræ valebunt SIGISMVNDE, nulla dies silentio te præteribit: nulla in honorem te nostra transibit Oratio: nulla nox non donatum te aliquā precum, nostrarum, contextione transcurret: omnibus te oblationibus frequentabimus; si non meminerimus tui, obliuioni detur dextera nostra; adhæreat lingua faucibus nostris, si non præposuerimus te in principio lætitiæ nostræ. Hos arbitror esse

Ambr:
in obitu
Valen-
tiniani.

De obitu
Valentiniani.

Ambr:
de obitu
Theod.

esse omnium vestrum sensus, idem cunctos tacitis vouere suspirijs. De me quid dicam? Angit me priuatus meus dolor: esse desijt is, quo viuente viuere cæpi; quo authore, id quidquid in me dignitatis est, consecutus sum. Patere sanctissime REX, vt exemplo magni Ambrosij, cum Theodosio suo iam vitâ functo sermonem miscerentis, iisdem verbis nobis vti liceat. Dileximus virum misericordem, humilem imperio, corde puro & pectore mansueto præditum. Dileximus virum, non sibi sed Reipublicæ natum Catholicæ, Religionis decus, Patriæ nostræ ornamentum, nullo vnquam periculo magnoperè commotum in ipso vitæ exitu mortis victorem. Dileximus virum, qui cum iam corpore solueretur, magis de statu Ecclesiarum, quàm de suis periculis angeretur. Aderant præsentēs Liberi, digna tanto Rege Proles, genus alto à sanguine Cæsarum, Regum: & quidquid in toto Christiano orbe summæ dignitatis splendore fulget, quidquid illustres Familias sublimioribus titulis decorat ac nobilitat; horum inquam sanguine Vos Serenissimi PRINCIPES progeniti, adfuitis morienti Patri: omnium Vestrum lachrymis compositus est; nihil quod illi deesset, nouissimâ in luce desiderauere oculi eius. Semper quidem ille pia & paterna dabat documenta Vobis rectè viuendi: sed tam præclaro vitæ exitu, quid aliud egit, quid uè in votis habuit, nisi vt sui, virtutumq; suarum memoriam pectoribus vestris insereret; vt quibus vitæ mortalis author esset, eosdem pareret Christo, immortalitati consecraret, cælo infereret.

Non est


Non est quod externa exempla multum requiratis: Sacræ illæ Maiestates, Parentes vestri, Vobis ad capeffendam Regiarum virtutum viam, ad parandum summum decus ductores sunt, eruntq; optimi: non aberrabitis, si eorum vestigijs insistere volueritis, & porrò velle deberis. Id à vobis SIGISMVNDVS, ANNA, & CONSTANTIA, REX, & REGINÆ, iam cælo receptæ mentes, & nunquam perituri Regni Reges & Hæredes, Patris deposcunt iure, quorum ipsa nomina quid aliud designant, nisi pietatem, religionem, sincerum Dei cultû, Ecclesiæ Catholicæ & Sacerdotalis ordinis patrocinium, Sedis Apostolicæ venerationem, Ciuium amorem, pauperum solatium, castitatem, pudicitiam, temperantiam, animi magnitudinem, iustitiam, & cunctarum virtutum complementum. Quod illi fuerunt, vt vos quoq; sitis, omni conatu eniti & contendere debetis, vt idem decus, eadem post fera fata vos maneat gloria. Tu inprimis Serenissime REX VLADISLAE, quem & ætatis, & dignitatis prærogatiua, cæteris altiùs extulit, quem Orbis Christianus Regio decoratum honore suspicit ac veneratur: non solum promptè ibis per vestigia Patris tui, verum etiam eadem tecum ortos familiâ, & faustis nutritos sub penetralibus; hos inquam, quos & naturæ lex, & magni Patris voluntas, & Reipubl: quæ se suosq; tibi vni addicit, tuam reuereri & comiter colere Maiestatem suadet, exemplo tuo duces ad culmen veri decoris. Tibi vni hoc onus ferendum est; in te Domus hæc Regia inclinata recumbit; id & Sacra Parentum manes, & Res publica

E 3

publica à te flagitat; id deniq; fraternus poscit amor. Felix sanè & beata te Rege Polonia Lithuaniaque. Ad prima tua auspicia, & vt primū Vota omnium in Te vnum flecti cæperunt, quanta rerum conuersio? quanta spes affulsit melioris æui? Pax publica priuataq; longo ab intervallo reuiruit; auræ pestiferæ lues extincta; prisca agrorum fertilitas redijt. Nihil dico, quanto studio ad Te REGEM dicendum omnes Ordines incubuerint, vt nemo qui non te posceret, in te spem Patriæ non reponeret, fuerit: vt magni viri priuata odia, priuatas lites, mox in perniciem multorum erupturas, tuo iudicio permittere non reuerint; & tu prudens felixq; arbiter, vno eodemq; temporis momento, multum inter se discordes & dissidentes, ita conciliabas vt deinceps stabili & sincerâ amicitia redintegrata, priuata odia ad amorē Reipublicæ transferrent. Præclara hæc sunt initia orientis Imperij tui, cuius nullum fortius est stabilimentum Ciuium amore: in cuius possessionem ita illaberis, vt nemo sit qui te in dies non magis diligat, & non plus se tibi, ob præstantia tua in Rempubl: merita debere libens volensq; profiteatur. Sed Tuæ virtutes aliud tempus, aliam poscunt occasionem, magis disertâ oratione & facundiori prædicandæ ore. Nunc ego dicendi finem facturus, non aberraturum me puto, si verbis Diui Ambrosij SIGISMVNDVM REGEM Magno Theodosio, vel parem, vel certè si rectâ lance virtutes vtriusq; examinentur superiorē, terræ iam mandandum, non solum pio prosequar sermone, verum etiam religiosis desiderijs & votis, supre-

supremum sanctæ illius animæ officium impendam. Conteritur cor meum, quia ereptus est vir, qualem ^{Ambrosius de obitu Theodosij.} vix possumus inuenire: sed tamen tu solus Domine inuocandus es; tu rogandus, vt eum in filijs repræsentēs; tu Domine, custodiens etiam paruulos, in hac humilitate saluos facito sperantes in te. Da requiem perfectam seruo tuo SIGISMVNDŌ, requiem illam, quam præparasti Sanctis tuis: illò conuertatur anima eius vnde descendit, vbi mortis aculeum sentire non possit; vbi cognoscat mortem hanc, non naturæ finem esse sed culpæ: quod enim mortuus est, peccato mortuus est, vt iam peccato locus esse non possit. Prosequamur eum vsque ad regionem viuorum, nec deseramus, donec fletu & precibus inducamus eum, quo sua illum vocant merita, in montem Domini sanctum, vbi perennis vita, vbi corruptellæ nulla contagio, nullus gemitus, nullus dolor, nulla consortia mortuorum, vera religio viuentiū, vbi mortale hoc induat immortalitatem, corruptibile hoc incorruptibilitatem.

D I X I.



IX D

2

Hist. Polon.

6 pp.

23

